

四庫全書

經部

欽定四庫全書

日講春秋解義卷二十二

僖公

二十有九年春介葛盧來

介杜注東夷國在城陽黔陬縣後為密州膠西縣地今山

東膠州西南有黔陬城
葛盧介君名附庸無爵

左傳二十九年春介葛盧來朝舍于昌衍之上

昌衍杜注魯縣

東南有昌平城在今
山東曲阜縣東南

公在會饋之芻米禮也

公羊傳

介葛盧者何夷狄之君也何以不言朝不能乎

朝也

不能行朝見之禮

穀梁傳

介國也葛盧微國之君未爵者也其曰來卑也

介僻處東隅其來於魯與鄆黎來同不能行朝禮故書來畧之也

公至自圍許

溫之會公朝于王所不以王所致而曰至自圍許所以著溫之會意在謀許而不在尊王也

夏六月會王人晉人宋人齊人陳人蔡人秦人盟于翟

泉

會上公羊穀梁有公字翟公羊作狄翟泉杜注洛陽城內大倉西南池水也今古城在河南洛陽縣東北

左夏公會王子虎晉狐偃宋公孫固齊國歸父陳轅

濤塗秦小子憖盟于翟泉尋踐土之盟且謀伐鄭也

卿不書罪之也

王子虎下盟列國諸侯大夫上敵公侯虧禮傷教故貶諸大夫諱公與盟

在禮卿不會公侯會伯子男可也

大國之卿當小國之君故可以會伯

子男傳言諸卿所以見貶

是會為王子虎晉狐偃宋公孫固齊國歸父陳轅

濤塗秦小子憖而公在焉乃貶而稱人諱不書公

何也翟泉近在王城之內而王子虎於此下與列國盟是謂上替諸侯大夫入天子之境上盟王子是謂下陵而無君之心著矣故以為大惡諱公不書諸國之卿貶稱人而王子亦與焉此正其本之義也按晉文三大盟會此其一也既非踐土王子涖盟之比又無于溫自嫌之心瀆分亂常莫此為甚春秋所以惡之

秋大雨雹

左傳 秋大雨雹為災也

劉向曰盛陽雨水溫暖而濕熱陰氣脅之不相入則轉而為雹雹者陰脅陽也胡氏以為魯之政在大夫故有是兆

冬介葛盧來

左傳 冬介葛盧來以未見公故復來朝禮之加燕好燕

禮好好貨一歲再來故加之 介葛盧聞牛鳴曰是生三犧皆用之

矣其音云問之而信

葛盧復來而明年有侵蕭之事則其再至非無故而修禮也

三十年春王正月

夏狄侵齊

左傳三十年春晉人侵鄭以觀其可攻與否狄閒晉之有鄭虞也夏狄侵齊

齊霸國之後與晉同盟狄之侵齊蓋料晉方圖鄭而不暇救也齊桓名陵之後狄加兵於晉晉文城

濮之後狄加兵於齊而桓文皆置而不問以楚人
僭王力爭中夏其志不測恐力分於狄而不能禦
楚耳

秋衛殺其大夫元咺

左 晉侯使醫衍酖衛侯

衍醫名晉侯怨衛侯欲殺而
罪不及死故使醫因治疾而

加酖

甯俞貨醫使薄其酖不死公為之請納玉于王

與晉侯皆十穀

雙玉曰穀魯本與
衛同好故為之請

王許之秋乃釋衛

侯 衛侯使賂周欵治廛曰苟能納我吾使爾為卿

恐元咺拒已

周治殺元咺及子適子儀

子儀瑕母弟不書殺賤也

公入祀先君周治既服將命

服卿服將入廟受命

周歆先入及

門遇疾而死治廛辭卿

見周歆死而懼

公羊傳

衛侯未至其稱國以殺何道殺也

時已得天子命還國于道

路遇而殺之故坐之與至國同

穀梁傳

稱國以殺罪累上也以是為訟君也衛侯在外

其以累上之辭言之何也待其殺而後入也

元咺以臣訟君君入則已奔君執則已歸不臣之

罪固不容誅乃稱國以殺而不去其官何也
咺雖有罪而衛侯賂其臣使殺其同列而求入焉則討之
不以其罪矣衛侯在外而稱國殺待殺而後入也

及公子瑕

穀梁傳公子瑕累也以尊及卑也

瑕之見殺以元咺欲立之也然使瑕安於其位則當與衛剝之書爵同經書公子是瑕能拒咺辭其

位而不居也衛侯告殺必以討篡為言魯衛方睦
舊史承告而書未必不蔽罪於瑕經以公子冠瑕
而書及則釁由元咺而瑕本無罪可知矣此孔子
之特筆也

衛侯鄭歸于衛

公羊傳此殺其大夫其言歸何歸惡乎元咺也曷為歸

惡乎元咺元咺之事君也君出則已入晉人執衛侯歸京師元咺

自晉歸衛君入則已出衛侯自楚歸衛以為不臣也

衛侯出奔於楚見執於晉皆不名今既歸國何以名之始歸而殺叔武再歸而及公子瑕春秋所深惡也諸侯之執不書歸其書歸者危不得歸也諸侯之歸必稱復不稱復者其義當絕也或曰難則書復易則第書歸義亦可通

晉人秦人圍鄭

左傳九月甲午晉侯秦伯圍鄭以其無禮于晉且貳于

楚也晉軍函陵秦軍汜南

杜注此東汜也在滎陽中牟縣南今屬河南開封府

佚之狐言于鄭伯曰國危矣若使燭之武見秦君師

必退

佚之狐燭之武皆鄭大夫

公從之辭曰臣之壯也猶不如人

今老矣無能為也已公曰吾不能早用子今急而求

子是寡人之過也然鄭亡子亦不利焉許之夜緹

而出

緹縣城而下

見秦伯曰秦晉圍鄭鄭既知亡矣若亡

鄭而有益于君敢以煩執事越國以鄙遠君知其難

也

設得鄭以為秦邊邑則越晉而難保

焉用亡鄭以倍鄰

倍益也

鄰之厚

君之薄也若舍鄭以為東道主行李之往來共其乏

困鄭在東故曰東道主行李使人君亦無所害且君嘗為晉君賜矣

許君焦瑕朝濟而夕設版焉君之所知也晉君謂惠公焦瑕杜

注晉河外五城之二邑在今陝州南朝濟河而夕設版築以距秦言背秦之速夫晉何厭之

有既東封鄭又欲肆其西封肆封疆也若不闕秦將焉

取之闕秦以利晉唯君圖之秦伯說與鄭人盟使杞

子逢孫揚孫戌之乃還三子秦大夫反為鄭守子犯請擊之公

曰不可微夫人之力不及此夫人謂秦穆公因人之力而敝

之不仁失其所與不知以亂易整不武秦晉和整而還相攻更為

亂也

吾其還也亦去之

初鄭公子蘭出奔晉

蘭鄭穆公從

于晉侯伐鄭請無與圍鄭許之使待命于東

晉東界鄭

石甲父侯宣多逆以為太子以求成于晉晉人許之

二子鄭大夫言穆公所以立

獻俘踐土鄭伯傅王溫之會同朝王所而翟泉之

盟不與故晉以貳于楚討之先儒皆據左傳謂晉

侯秦伯親將貶而稱人而以經考之自陽處父伐

江以前外大夫無以名見者凡稱人皆大夫將之

辭耳

介人侵蕭

蕭宋附庸也介再來魯而次年遂侵蕭豈懼為宋所忌而預附於魯以求援與

冬天王使宰周公來聘

左傳冬王使周公閱來聘

閱周公名

饗有昌歠白黑形鹽

昌歠

昌蒲菹白熬稻黑熬黍形鹽鹽形象虎

辭曰國君文足昭也武可畏也

則有備物之饗以象其德薦五味羞嘉穀鹽虎形

嘉穀

熬稻黍也以象文
鹽虎形以象武以獻其功吾何以堪之

穀梁傳天子之宰通于四海

公子遂如京師

此聘周之始

遂如晉

此聘晉之始

左傳東門襄仲將聘于周

襄仲即公子遂

遂初聘于晉

公羊傳大夫無遂事此其言遂何公不得為政爾

不從公政

也令

穀梁傳以尊遂乎卑此言不敢叛京師也

謂若即言如京師如晉則

同周于晉叛而不尊天子故云遂
使若公子遂因聘周而自往晉也

天王使宰周公下聘必因晉侯帥諸侯再朝重禮
以報之而因及齊魯諸大國也魯君不能躬拜王
命而使公子遂報聘又比周於晉不待貶絕而惡
見矣凡書遂有以二事出者公子遂如京師遂如
晉祭公來遂逆王后于紀是也有以一事出而專
繼事者公子結媵陳人之婦遂及齊侯宋公盟是
也其是非得失則存乎其事矣

三十有一年春取濟西田

左三十一
年春取濟西田分曹地也

二十八
年晉文
討曹分
其地竟

界未定至是
乃以賜諸侯

使臧文仲住宿于重館

重魯地杜注高
平方與縣西北

有重鄉城
館候館也

重館人告曰晉新得諸侯必親其共不速

行將無及也從之分曹地自洮以南東傳于濟盡曹

地也

言獲地之多杜注濟水自榮
陽東過魯之西至樂安入海

公羊

惡乎取之取之曹也曷為不言取之曹諱取同

姓之田也此未有伐曹者則其言取之曹何

言魯未
嘗伐曹

何以言 取曹田 晉侯執曹伯班其所取侵地于諸侯也 班者

之 辭 晉侯執曹伯班其所取侵地于諸侯則何諱乎取

同姓之田久也 濟西故魯田見侵于曹歷時既久不得復為魯地故以取邑之例諱之

濟西之田不繫曹者明其為魯田也復故田而謂之取何也借晉人之力而彊取之則與取非其有者同凡取人之有其惡易見取已之有而不以道其罪難知聖人正名曰取所以顯微也

公子遂如晉

左傳襄仲如晉拜曹田也

往年宰周公來而公子遂報聘則以二事出今復以濟西之田使遂如晉慢於尊周而謹於事晉直書而罪自見矣

夏四月四卜郊不從乃免牲猶三望

左傳夏四月四卜郊不從乃免牲非禮也猶三望亦非

禮也禮不卜常祀必其時而卜其牲日卜牲與日牛卜

日曰牲既得吉日則牲成而卜郊上怠慢也怠于古典慢瀆

龜策望郊之細也不郊亦無望可也

公羊傳

曷為或言三卜或言四卜三卜禮也四卜非禮

也三卜何以非禮四卜何以非禮求吉之道三

三卜吉凶必有

相奇者可以決疑故求吉必三卜

禘嘗不卜郊何以卜卜郊非禮也

卜郊何以非禮魯郊非禮也魯郊何以非禮天子祭

天諸侯祭土

土謂社也

天子有方望之事

方望謂郊時所望祭四方羣神

日月星辰風伯雨師五嶽四瀆及餘山川凡三十六所

無所不通

盡八極之內天地之所覆

載無所不至故得郊也

諸侯山川有不在其封內者則不祭也

曷言或言免牲或言免牛免牲禮也免牛非禮也免

縱也卜郊不吉則免牛何以非禮傷者曰牛養牲不謹致災

傷天不饗用不得復為三望者何望祭也然則曷祭

祭大山河海曷為祭大山河海山川有能潤于百里

者天子秩而祭之此皆助天宣氣布功故祭天及之秩者隨其大小尊卑高下所宜

觸石而出膚寸而合側手為膚按指為寸言其觸石理而出無有膚寸而不合不

崇朝而徧雨乎天下者惟大山爾河海潤于千里亦

通氣致雨潤澤及乎千里猶者何通可以已也已止何以書譏不

郊而望祭也

穀梁傳

夏四月不時也

郊春事也

四卜非禮也

四卜則入夏

免牲

者為之緇衣熏裳有司玄端奉送至于南郊免牛亦

然

玄端黑衣接神之道玄熏者天地之色也南郊天位歸之于陽也全曰牲傷曰牛牛有變而不郊故

卜免牛

乃者亡乎人之辭也

亡乎人若無賢人也

猶者可以已

之辭也

天子以長至之日郊祀上帝孟春辛日祈穀亦謂

之郊魯僭祈穀之郊已為歲事之常矣春秋欲削

而不存則無以志其失悉書之則有不勝書故因禮之變而特書以見義也凡郊三卜不從則不郊三不吉而至於四失禮又甚矣不郊而或言免牲或言免牛何也未牲曰牛既卜曰牲免牛猶可再卜牛至卜免牲吉則不可郊明矣故不復言不郊望望而祭之郊之細也周官四望蓋望四方魯望止於三公羊謂大山河海鄭玄謂海岱淮賈逵服虔謂分野之星及國中山川杜預因之而胡氏安

國獨取公羊之說於理為近要非諸侯所得為也
不郊而望故特書曰猶猶者可已而不已之詞

秋七月

附錄左傳

秋晉蒐于清原作五軍以禦狄

二十八年晉作三行今罷之更

為上下新軍清原杜注河東聞喜縣北有清原在今山西稷山縣西北

趙衰為卿

二十七年

命趙衰為卿讓于欒枝令始從原大夫為新軍帥

冬杞伯姬來求婦

公羊傳

其言來求婦何兄弟辭也其稱婦何有姑之辭

也

穀梁傳 婦人既嫁不踰竟杞伯姬來求婦非正也

昏姻常事不書此何以書求婦非正也婦言不踰
閭闔越竟而為子謀昏失婦義矣故謹之

狄圍衛

十有二月衛遷于帝丘

帝丘杜注東郡濮陽縣帝顓頊之虛故曰帝丘今直隸開州有

顓頊城

左傳 冬狄圍衛衛遷于帝丘卜曰三百年衛成公夢康

叔曰相奪予享

相夏后啓之孫居帝丘享祭也

公命祀相甯武子不

可曰鬼神非其族類不歆其祀

歆猶享也

祀鄩何事

言祀鄩夏

後自當祀相

相之不享于此久矣非衛之罪也不可以間

成王周公之命祀

諸侯受命各有常祀

請改祀命

改祀相之命

狄嘗入衛齊桓率諸侯為城楚丘以定之今為狄所圍又自遷于帝丘夫立國在於自彊楚人謀徙于阪高為賈曰我能往寇亦能往春秋書此以見衛之不能自彊而晉文衰暮無以大庇諸姬亦可見

矣

附錄左傳鄭洩駕惡公子瑕鄭伯亦惡之故公子瑕出奔

楚

瑕文公子洩駕鄭大夫傳為納瑕張本

三十有二年春王正月

附錄三十二年春楚鬬章請平于晋晋陽處父報之

晋楚始通

陽處父晋大夫晋楚自春秋以來始交使命為和同

夏四月己丑鄭伯捷卒

捷公羊作接

衛人侵狄

左傳夏狄有亂衛人侵狄狄請平焉

秋衛人及狄盟

左傳秋衛人及狄盟

及者衛為志不地者盟於狄也衛畏狄彊遷都避之今不能聲罪致討乃乘亂而掠其境則不武又就其地汲汲而與之盟則非禮春秋書之以罪衛也

冬十有二月己卯晉侯重耳卒

左傳冬晉文公卒庚辰將殯于曲沃

殯窆棺也曲沃有舊宮焉

出絳

柩有聲如牛

如牛响聲

卜偃使大夫拜曰君命大事將有

西師過軼我擊之必大捷焉

聲自柩出故曰君命大事戎事也卜偃聞秦密

謀故因柩聲以正衆心

杞子自鄭使告于秦曰

三十年秦使大夫杞子戍鄭

鄭人使我掌其北門之管

管籥也

若潛師以來國可得

也穆公訪諸蹇叔

蹇叔秦大夫

蹇叔曰勞師以襲遠非所

聞也師勞力竭遠主備之無乃不可乎師知所為鄭

必知之勤而無所必有悖心

士卒勞而無所得必生悖戾之心害及良善

且行千里其誰不知公辭焉召孟明西乞白乙使出

師于東門之外

孟明百里孟明視西乞西乞術白乙白乙丙

蹇叔哭之曰

孟子吾見師之出而不見其入也公使謂之曰爾何

知中壽爾墓之木拱矣

合手曰拱言其過老悖不可用

蹇叔之子與

師哭而送之曰晉人禦師必于殽

殽杜注在弘農澠池縣西

殽有

二陵焉

大阜曰陵

其南陵夏后皋之墓也

皋夏桀之祖父

其北陵

文王之所辟風雨也

此道在二殽之間南谷中谷深委曲兩山相巖故可以辟風雨

必死是間

以其深險故

余收爾骨焉秦師遂東

為明年晉敗秦于殽

傳

晉文公之入也左氏言之甚詳而經不書何也諸侯有朝聘之禮赴告之命若告命不通記注文闕聖人因魯史以作經有可損而不能益也

三十有三年春王二月秦人入滑

左傳

三十三年春秦師過周北門左右免胄而下

北門王城

之北門胄兜鍪兵車非大將御者在中故左右下御不下

超乘者三百乘王孫滿

尚幼觀之言于王曰秦師輕而無禮必敗

無禮謂過天子門不

卷甲束兵超乘示勇輕則寡謀無禮則脫脫易也入險而脫又不

能謀能無敗乎及滑鄭商人弦高將市于周遇之以

乘韋先牛十二犒師

乘韋四韋也皮熟曰韋生曰革古者將獻遺于人必有以先之

曰寡君聞吾子將步師出于敝邑敢犒從者不腆敝

邑為從者之淹居則具一日之積行則備一夕之衛

弦高知秦將襲鄭欲敗其謀故詐言君命步猶行也積謂芻米菜薪衛捍禦之具且使遽告

于鄭遽傳車

鄭穆公使視客館

秦杞子逢孫楊孫戍鄭鄭人館之至是聞弦高

之言使視其所為

則東載厲兵秣馬矣

果見三子欲為內應使皇武子

辭焉

皇武子
鄭大夫

曰吾子淹久于敝邑唯是脯資餼牽竭

矣

資糧也生曰餼
牽謂牛羊豕

為吾子之將行也鄭之有原圃猶

秦之有具圃也吾子取其麋鹿以閒敝邑若何

原圃
具圃

皆圃名杜注滎陽中牟縣西有圃田澤使秦戌
自取麋鹿以為行資蓋明示三子已知其情

杞子

奔齊逢孫揚孫奔宋孟明曰鄭有備矣不可冀也攻
之不克圍之不繼吾其還也滅滑而還

穀梁
傳

滑國也

滅滑而書入者不能有其地非末滅也詐謀不遂

又肆悖心以滅無罪之小國而不虞晉之擬其後
非道失謀其困也宜矣

齊侯使國歸父來聘

左傳齊國莊子來聘自郊勞至于贈賄禮成而加之以

敏聘禮賓至于郊君使卿朝服用束帛勞及聘事皆

畢乃去賓遂行舍于郊公使卿贈如覲幣是來有

郊勞去有贈賄也臧文仲言于公曰國子為政齊猶

傳

有禮君其朝焉臣聞之服于有禮社稷之衛也為公如齊

二十八年公子遂如齊平舊怨也今國歸父來報
遂之聘也古者諸侯邦交其禮甚簡入春秋時比
周相結使命日煩至國歸父來聘而大夫之交政
列國者紛紛無制矣

夏四月辛巳晉人及姜戎敗秦于殽

敗秦下左傳穀梁有師字姜戎姜姓

之戎居晉南鄙戎子駒支之先也穀杜注在弘農澠池縣西在今河南永寧縣北

左傳晉原軫曰秦違蹇叔而以貪勤民天奉我也

秦師還過

晉竟先軫謀邀奉不可失敵不可縱縱敵患生違天而伐之奉與也

不祥必伐秦師樂枝曰未報秦施而伐其師其為死

君乎

言以君死故忘秦施

先軫曰秦不哀吾喪而伐吾同姓

滑與

晉同姓

秦則無禮何施之為吾聞之一日縱敵數世之

患也謀及子孫可謂死君乎遂發命遽興姜戎

以傳車起

姜戎之兵欲其速也

子墨衰經

晉文公未葬故襄公稱子以凶服從戎故墨之

梁弘御

戎萊駒為右夏四月辛巳敗秦師于殽獲百里孟明

視西乞術白乙丙以歸遂墨以葬文公晉于是始墨

後遂常以為俗記禮所由變

文嬴請三帥

文嬴晉文公始適秦秦穆公所妻夫人襄公嫡

母三帥
孟明等

曰彼實構吾二君寡君若得而食之不厭君

何辱討焉使歸就戮于秦以逞寡君之志若何公許

之先軫朝問秦囚公曰夫人請之吾舍之矣先軫怒

曰武夫力而拘諸原婦人暫而免諸國

暫猶卒也

墮軍實

而長寇讎

墮毀也

亡無日矣不顧而唾公使陽處父追

之及諸河則在舟中矣釋左驂以公命贈孟明

矯稱襄公

命贈欲使還拜
謝因而執之

孟明稽首曰

孟明知其詐乃還于舟中稽首拜命

君之

惠不以累臣釁鼓

累囚繫也殺人以血塗鼓謂之釁鼓

使歸就戮于秦

寡君之以為戮死且不朽若從君惠而免之三年將

拜君賜

意欲報伐晉

秦伯素服郊次

待之于郊

鄉師而哭曰孤

違蹇叔以辱二三子孤之罪也

降名稱孤

不替孟明孤之

過也大夫何罪且吾不以一眚掩大德

青過也

公羊傳

其謂之秦何

稱國

夷狄之也曷為夷狄之秦伯將

襲鄭百里子與蹇叔子諫曰千里而襲人未有不亡

者也秦伯怒曰若爾之年者宰上之木拱矣

宰冢也

爾

曷知師出百里子與蹇叔子送其子而戒之曰爾即

死必于殽之嶽巖是文王之所辟風雨者也

其地險隘一可

要百故文王過之驅馳常若辟風雨襲鄭所當由也

吾將尸爾焉子揖師而行

揖其父于師中介冑不拜為其拜如蹲

百里子與蹇叔子從其子而哭

之秦伯怒曰爾曷為哭吾師對曰臣非敢哭君師哭

臣之子也弦高者鄭商也遇之殽矯以鄭伯之命而

犒師焉或曰往矣或曰反矣

軍中語也時以為鄭實使弦高犒之或以為鄭

伯已知將見襲必設備不

如還或曰師既出當遂往然而晉人與姜戎要之殽

而擊之

然而上議猶豫留往之頃也要邀也

匹馬隻輪無反者

言盡獲之其

言及姜戎何姜戎微也稱人亦微者也何言乎姜戎

之微先軫也

先軫晉大夫也言姜戎微則知稱人者尊

或曰襄公親之

親將

襄公親之則其稱人何貶曷為貶君在乎殯而用師

危不得葬也詐戰不日

詐卒也齊人語也

此何以日盡也

盡俘

之惡其

不仁

穀梁

傳不言戰而言敗何也狄秦也其狄之何也秦越

千里之險入虛國

滑無備故言虛國

進不能守退敗其師徒

亂人子女之教無男女之別秦之為狄自穀之戰始

也

進不能守謂入滑而去退敗其師謂敗于穀亂人子女謂入滑之時縱暴亂也

秦伯將襲

鄭百里子與蹇叔子諫曰千里而襲人未有不亡者

也秦伯曰子之冢木已拱矣何知

言其老無知

師行百里

子與蹇叔子送其子而戒之曰女死必于穀之巖陰

之下我將尸女于是

尸女者叔女尸

師行百里子與蹇叔子

隨其子而哭之秦伯怒曰何為哭吾師也二子曰非

敢哭師也哭吾子也我老矣彼不死則我死矣

畏秦伯怒

故云彼我必有死者

晉人與姜戎要而擊之穀匹馬倚輪無反

者

倚輪一隻之輪

晉人者晉子也其曰人何也微之也何為

微之不正其釋殯而主乎戰也

秦自十三年圍鄭已識地形又見齊晉更霸宋楚
爭衡乘晉文新歿逾周而襲鄭使其謀得逞將據
鄭以力征東夏蠶食諸姬其無王之心未必不同
於荆楚晉襄要而擊之隻輪不反終春秋之世秦
卒不能逾晉而東故敗穀之勲等於城濮先儒乃
以墨衰即戎為晉子罪誤矣國君之孝異於匹夫

社稷之役可以變禮故魯公禽父在喪而從金革
孔子與之誓在尚書論具禮記且春秋之法外以
諱為善故特書晉人若晉子未嘗在師者然如以
為貶則凡會盟侵伐以喪出而稱爵稱子者乃得
為褒乎陸氏淳謂孔子許其以權變禮故為之諱
卓矣

癸巳葬晉文公

穀梁
傳 日葬危不得葬也

晉先君有文侯而重耳復謚為文非禮也

狄侵齊

左傳狄侵齊因晉喪也

狄間晉喪而侵齊穀師方罷營葬先君齊晉懸隔
千里即有赴告晉師非踰月不能出絳何及於狄
先儒既以墨衰禦秦責晉而又以不能攘狄罪之
義無所處矣

公伐邾取訾婁

訾婁公羊作業穀梁作訾樓訾婁邾地當在今山東濟寧州界

秋公子遂帥師伐邾

左傳

公伐邾取訾婁以報升陘之役

在二十二年

邾人不設

備秋襄仲復伐邾

僖公懷升陘之忿以晉文始霸不敢興報怨之師
晉文既歿秦狄交誼故乘其閒而再伐邾以取利
焉齊桓之歿楚宋爭霸魯亦閒之而再伐邾每乘
霸國多事而陵弱暴寡何以為秉禮之國乎

晉人敗狄于箕

箕杜注大原陽邑縣南有箕城在今山西大谷縣東南

左傳狄伐晉及冀八月戊子晉侯敗狄于冀卻缺獲白

狄子

白狄狄別種也子白狄之君子爵也

先軫曰匹夫逞志于君而無

討

謂不顧而唾

敢不自討乎免胄入狄師死焉狄人歸其

元

元首

面如生初曰季使過冀見冀缺耨其妻饁之

白季

胥臣也冀杜注晉邑今山西河津縣東有冀亭冀缺即卻缺耨鋤也野饋曰饁

敬相待如賓

與之歸言諸文公曰敬德之聚也能敬必有德德以

治民君請用之臣聞之出門如賓承事如祭仁之則

也公曰其父有罪可乎

缺父冀芮欲弑文公在二十四年

對曰舜之

罪也殛鯨其舉也興禹管敬仲桓之賊也實相以濟

康誥曰父不慈子不祗兄不友弟不共不相及也康誥

周書祗敬也詩曰采芣采芣無以下體君取節焉可也詩國

風詩非之菜上善下惡食之者不以其惡而棄其善言可取其善節文公以為下軍大

夫反自箕襄公以三命命先且居將中軍且居先軫之子其父

死敵故進之以再命命先茅之縣賞胥臣曰舉卻缺子之

功也先茅絕後故取其縣以賞胥臣以一命命卻缺為卿復與之冀

還其父故邑亦未有軍行雖登卿位未有軍列

秦謀襲鄭狄攻齊衛乘文公之新歿而爭衡於中
夏也晉子敗秦于殽又敗狄于箕而霸統遂定諸
侯賓服其功甚偉且皆應敵之師而先儒多以為
病亦未揆於事理之實耳

冬十月公如齊

十有二月公至自齊

報國莊子之聘也天王下聘不朝於京師齊國歸
父來乃躬報謝不加貶而義自見矣

乙巳公薨于小寢

左傳冬公如齊朝且弔有狄師也反薨于小寢即安也

小寢夫人寢也譏公就所安不終于路寢

穀梁傳小寢非正也

周制王宮六寢路寢一小寢五戴記君日出而眡朝退適路寢聽政使人眡大夫大夫退然後適小寢釋服是路寢治事之所小寢燕息之地也魯子以諸侯有三宮則列國之制蓋降於王其以路寢

為正則一爾

隕霜不殺草李梅實

隕公羊作實

公羊傳

何以書記異也何異爾不時也

穀梁傳

未可殺而殺舉重也可殺而不殺舉輕也

定元年隕

霜殺菽此年隕霜不殺草重謂菽也輕謂草也輕者不死則重者不死可知

實之為言猶

實也

實子也

周之十二月夏之十月也霜既隕而草不殺固已

異矣梅李再榮非時而成實陰陽失序物反其常

先儒以為魯政不綱三桓盛彊干權擅國咎徵之
先見者也

晉人陳人鄭人伐許

左傳 晉陳鄭伐許討其貳于楚也

陳鄭久服於楚晉人討許不用齊魯宋衛之師而
獨與陳鄭同役以繼文之業席敗秦敗狄之威楚
人不敢北鄉職是故也而先儒皆以為譏亦過矣

附錄
左傳

楚令尹子上侵陳蔡

子上即

陳蔡成遂伐鄭將

納公子瑕

三十一年瑕奔楚

門于桔枋之門瑕覆于周氏之

汪

車傾覆池水中

外僕髡屯禽之以獻

鄭之外僕髡髮而名屯者殺瑕以獻鄭伯

文夫人斂而葬之鄆城之下

鄭文公夫人也鄆城杜注故鄆國在滎陽密縣

東北今屬河南開封府

晉陽處父侵蔡楚子上救之與晉師

夾泚而軍

泚水杜注出魯陽縣東經襄城定陵入汝

陽子患之使謂子上

曰吾聞之文不犯順武不違敵

有文德者不犯順意謂相約涉水而伐其

師是犯順也有武德者不棄敵意謂相約退舍而自棄去是違敵也

子若欲戰則吾退

舍子濟而陳

欲辟楚使渡成陳而後戰

遲速唯命不然紓我

紓緩也

老師費財亦無益也乃駕以待子上欲涉大孫伯曰

大孫伯即成大心不可晉人無信半涉而薄我悔敗何及不

如紆之乃退舍

楚退欲使晉渡

陽子宣言曰楚師遁矣遂歸

楚師亦歸大子商臣譖子上曰受晉賂而辟之楚之

恥也罪莫大焉王殺子上

商臣怨子上止王立已譖之

葬僖公

緩

十一月僖公薨文公元年四月葬僖公并閏七月乃葬故傳云緩

作主非禮也

文二


年乃作主遂因葬文通識之

凡君薨卒哭而祔祔而作主持祀于

主烝嘗禘于廟

既葬反虞則免喪故曰卒哭哭止也以新死者之神祔之于祖尸柩已遠

孝子思慕故造木主立几筵特用喪禮祭祀于寢不
同之于宗廟言凡君者謂諸侯以上不通于卿大夫
冬祭曰烝秋祭曰嘗新主既立特祀于寢則宗廟四
時常祀自如舊也三年禮畢又大禘乃皆同于吉



日講春秋解義卷二十二

欽定四庫全書

經部

日講春秋解義卷二十三

四

詳校官監察御史_臣吳瞻泰

給事中_臣溫常綬覆勘

覆校官中書_臣田尹衡

校對官主事_臣張培

謄錄監生_臣張永浙

欽定四庫全書

日講春秋解義卷三十三

文公

公名興傳公母海聲姜誼法慈惠愛民曰知惠信按禮曰文

周

襄王二十六年魯文公八年襄王崩子頃王亦卒十四年頃王崩子匡王立

鄭

穆公

齊

昭公七年魯文公十四年昭公卒子舍立九月舍弒商人立文公十八年昭公弒惠公元立

宋

成公十一年魯文公七年成公卒昭公柱白立文十六年昭公弒弟文公鮑立

晉

襄公繼籥二十二年魯文公六年襄公卒子宣公夷年立是年趙盾為政

衛

成公九年

蔡

莊公十九年魯文公十五年莊公卒子文公申立

曹

共公二十七年魯文公九年共公卒子文公壽立

滕

詳見隱公元年魯文公十二年滕昭公來朝

陳

共公六年魯文公十三年共公卒子靈公平國立

杞

詳見隱公元年

薛

詳見隱公元年及僖公元年

莒

魯文公十八年莒太子僕弑紀公庶其子季佗立

邾

文公四十二年魯文公十三年邾文公卒子定公獲且立

許

僖公二十九年魯文公五年僖公卒昭公錫我立

小邾

詳見僖公元年

楚

成王四十六年魯文公元年冬商臣弑成王而自立為穆王文十三年穆王卒子莊王立始爭霸

秦

穆公三十四年○秦用孟明以為政魯文公二年秦伯伐晉濟河焚舟遂霸西戎史記穆公三十七年益國十二開地千里天子使召公過賀穆公以金鼓文六年穆公卒子康公瑩立文十八年康公卒子共公

稻立

吳

詳見隱公元年

越

詳見隱

公元年

欽定四庫全書

日講春秋解義卷二十三

文公

名興僖公之子母聲姜以襄王二十六年即位諡法慈惠愛民曰文忠信接禮曰文

元年春王正月公即位

穀梁

繼正即位正也

繼正謂繼正卒也隱去即位以見讓桓書即位示安恐莊閔僖

不言即位

皆繼弒

即位者告廟臨羣臣也必逾年然後改元書即位者緣始終之義一年不二君緣臣民之心不可曠

年無君也即位必以歲首正始也自古通喪三年告廟則冢宰攝而行之如伊尹祠於先王是也惟即位臨羣臣則權一時之宜如借吉例事畢即反喪服蓋易世傳授國之大事當嚴其禮而王侯以國為家雖先君之喪猶以為已私服也魯自隱至文桓公弑立外惟文公書即位蓋國無變事舉行其禮則史書其事也

二月癸亥日有食之

公羊日上
有朔字

天王使叔服來會葬

左傳元年春王使內史叔服來會葬叔氏服字公孫敖聞其

能相人也

公孫敖魯大夫慶父子叔服能視人顏色知吉凶

見其二子焉叔

服曰穀也食子難也收子

穀公孫敖長子文伯難公孫敖次子惠叔食子奉祭

祀供養者也收子葬身者也

穀也豐下必有後于魯國

豐下蓋面方為八年

公孫敖

奔莒傳

公羊傳其言來會葬何會葬禮也

殺梁

葬曰會

言會明非一人之辭

其志重天子之禮也

凡崩薨卒葬人道之大變也不以得禮為常事而不書其甚害於王法如君弑賊不討吳楚稱王之類則聖人有削而不書以示義者矣諸侯使卿來會葬不書常事也王使來魯則無不書尊王命且以著魯不朝聘而王數加禮為失政也王於諸侯有弔贈含襚之禮而使人會葬則諸侯相交之喪紀也況天王之喪葬魯君不聞親赴而王臣先至以待諸侯之葬期冠履倒置至此極矣

附錄
左傳

于是閏三月非禮也

于歷法當在僖公末年誤于今年三月置閏蓋時達

歷者

所識先王之正時也履端于始舉正于中歸餘于終

履步也日月運轉于天猶人之行步故推歷謂之步歷步歷之始以為術之端首謂以十一月一日子初一刻冬至為歷首暮之日三百六十有六日日月之行又有遲速而必分為十二月舉中氣以正月月朔之與月節每月各剋一日所有餘日歸之于終積成一月則置之為閏故言歸餘于終履端于

始序則不愆

四時無愆過

舉正于中民則不惑

斗建不失其次寒暑

不失其常故無疑惑

歸餘于終事則不悖

四時得所則事無悖亂

夏四月丁巳葬我君僖公

左傳夏四月丁巳葬僖公

殺梁薨稱公舉上也葬我君接上下也僖公葬而後

舉諡諡所以成德也于卒事乎加之矣

諸侯五月而葬僖公以十二月薨以四月葬於禮

為合矣

天王使毛伯來錫公命

左傳王使毛伯衛來錫公命
毛國伯爵衛其字也
諸侯為王卿士者

公羊傳錫者何賜也命者何加我服也
復發傳者嫌禮
與桓公同死生

異也古者三載考績三考黜陟此明文
公新即位功未足施而錫之非禮也

殺梁

禮有受命無來錫命錫命非正也

命所當錫者三終喪入見則有黻冕圭璧然後歸是也
所謂以士服見天子賜之黻冕圭璧然後歸是也
歲時來朝則有車馬袞黼之錫如采菽之詩所稱
是也敵愾獻功則有彤弓旅矢之錫如彤弓之詩
所稱是也然是三者皆諸侯至王所受之天子無
往錫之禮今文公居喪始越五月既非初見之時

又無繼朝獻功之事毛伯之錫何為哉故書以譏之

晉侯伐衛

左傳晉文公之季年諸侯朝晉衛成公不朝使孔達侵

鄭伐鄶訾及匡

孔達衛大夫匡杜注在潁川新汲縣東北今河南扶溝縣西有匡城

晉

襄公既祥

祥謂小祥也

使告于諸侯而伐衛及南陽

南陽杜注

河內地

先且居曰效尤禍也

尤衛不朝故伐今不朝王是效衛致禍時王在溫故

勸之請君朝王臣從師晉侯朝王于溫先且居胥臣伐

衛五月辛酉朔晉師圍戚六月戊戌取之獲孫昭子

昭子衛大

夫食戚邑

齊桓於霸為盛而業止其身晉文得國日淺視桓
少遜而子孫繼霸者几十世則以襄公克纘父功
尊獎王室故威加諸侯而霸業不替如衛侯不朝
將告于諸侯而伐之乃能聽先且居之言朝王于
溫而後往伐可謂知禮矣

叔孫得臣如京師

左傳 叔孫得臣如周拜

得臣叔牙之孫如周謝錫命

不自朝而使卿拜命終喪之後又不類見慢王之罪其可逭乎趙氏鵬飛以拜命為非謂釋衰服鼓於心不安說亦無據在禮喪公弔之必有拜者使人拜未聞遂釋服也

衛人伐晉

左傳 衛人使告于陳

以晉伐告陳共公曰更伐之我辭之

見伐

求和不競太甚故使報伐示己力足以衛孔達帥師距晉我陳侯也言為衛以辭謝晉求和

伐晉君子以為古古者越國而謀

衛人聽陳共公謀使孔達伐晉夫古者越國而謀必義事也今陳與衛不謀以小事大之禮而乃稱兵報伐他日陳為衛請而執達以說其為謀也過矣

秋公孫教會晉侯于戚

此大夫專會諸侯之始戚杜注衛邑在頓丘衛縣西今直隸開

州北有古戚城

左傳秋晉侯疆戚田故公孫教會之

晉取衛田正其疆界公孫教即穆伯

慶父之

子也

魯之三家雖自僖公而僖之世尚未見其恣也及
文公之初則已專盟會矣夫諸侯非王命自為會
猶以為罪況以列卿上會霸主豈非政逮大夫之
漸乎魯與晉交失之矣

冬十月丁未楚世子商臣弑其君頹

頹公羊穀
梁作髡

左傳初楚子將以商臣為太子訪諸令尹子上子上曰

君之齒未也

齒年也
言尚少

而又多愛黜乃亂也楚國之舉

恒在少者

舉立也

且是人也蠱目而豺聲忍人也不可

立也弗聽既又欲立王子職而黜太子商臣

職商臣庶弟

商臣聞之而未察告其師潘崇曰若之何而察之潘

崇曰享江芊而勿敬也

江芊成王妹嫁于江

從之江芊怒曰呼

役夫

呼發聲也役夫賤者稱

宜君王之欲殺女而立職也告潘

崇曰信矣潘崇曰能事諸乎

問能事職不

曰不能能行乎

曰不能能行大事乎曰能

大事謂試君

冬十月以宮甲圍

成王

太子宮甲僖二十八年王以東宮卒從子玉蓋取此宮甲

王請食熊蹯而死

熊掌難熟與
久將有外救

弗聽丁未王縊諡之曰靈不暝曰成乃

暝穆王立以其為太子之室與潘崇使為太師且掌

環列之尹

環列之尹宮衛之
官列兵而環王宮

穀梁傳

日髡之卒所以謹商臣之弑也夷狄不言正不

正

中國君卒正者例日篡立不正者不日夷狄君卒
皆略而不日今書日謹識商臣之大逆耳不以明

髡正與
不正

楚僭號已久世子必不誓於天子今特書世子以

著其罪也不言其父言其君者君之於世子有父

之親有君之尊言世子所以明有父之親言君所以明有君之尊也楚顓僭王在位四十六年陵暴列國戰克攻取毒被天下終以昧於父子君臣之道禍發蕭牆所謂不善之積必有餘殃豈不信與公孫敖如齊

左傳穆伯如齊始聘焉禮也凡君即位卿出並聘踐修舊好要結外援好事鄰國以衛社稷忠信卑讓之道也忠德之正也信德之固也卑讓德之基也

諸侯初即位於列國有通嗣君之禮然得臣聘周而赦聘齊等周於齊失禮已甚或謂聘齊以請婚在喪謀婚尤為非禮不貶而惡見矣

附錄
左傳

穀之役

在僖三十三年

晉人既歸秦帥秦大夫及左右

皆言于秦伯曰是敗也孟明之罪也必殺之秦伯曰是孤之罪也周芮良夫之詩曰大風有隧貪人敗類

詩大雅隧蹊徑也言貪人之敗善類若大風之行毀壞衆物所在成蹊徑

聽言則對誦言

如醉

言得道聽塗說之言則喜而答對典誦之言則聞之若醉

匪用其良覆俾我

悖

覆反也。悖使也。不用良臣之言反使。我為悖亂。

是貪故也。孤之謂矣。孤實

貪以禍夫子。夫子何罪。復使為政。

為明年秦晉戰彭衙傳。

二年春王二月甲子晉侯及秦師戰于彭衙。秦師敗績。

彭衙杜注秦地。馮翊陽縣西北。有彭衙城在今陝西白水縣東北。

左傳

二年春秦孟明視帥師伐晉以報殽之役。二月晉

侯禦之。先且居將中軍。趙衰佐之。

代卻漆

王官無地。御

戎

代梁弘

狐鞠居為右。

鞠居續簡伯

甲子及秦師戰于彭衙。

秦師敗績。晉人謂秦拜賜之師。

以孟明言三年將拜君賜故嗤之。

戰

于穀也晉梁弘御戎萊駒為右戰之明日晉襄公縛

秦囚使萊駒以戈斬之囚呼萊駒失戈狼曠取戈以

斬囚禽之以從公乘遂以為右

因上文萊駒失戈故言禽之生死皆曰禽

箕之役

在僖三十三年

先軫黜之而立續簡伯狼曠怒其友

曰盍死之曠曰吾未獲死所其友曰吾與女為難

欲共

殺先軫

曠曰周志有之勇則害上不登于明堂

周志周書也明

堂所以策功序德故不義之士不得升

死而不義非勇也共用之謂勇

共用死國用

吾以勇求右無勇而黜亦其所也

言今死而不義更成

無勇宜

見退

謂上不我知黜而宜乃知我矣

言今見黜而合宜則吾不

得復言上

子姑待之及彭衙既陳以其屬馳秦師死

不我知

焉晉師從之大敗秦師君子謂狼曠于是乎君子詩

曰君子如怒亂庶遄沮

詩小雅遄疾也沮止也言君子之怒必以止亂

又曰

王赫斯怒爰整其旅

詩大雅

怒不作亂而以從師可謂

君子矣秦伯猶用孟明孟明增修國政重施于民

趙成子言于諸大夫曰

成子趙衰

秦師又至將必辟之懼

而增德不可當也詩曰毋念爾祖聿修厥德

詩大雅言念其

祖考則宜述修其德以顯之毋念念也

孟明念之矣念德不怠其可敵

乎

為明年秦人伐晉傳

秦穆公邀利以取敗不自悔責而事報復師出無名故不稱伐晉襄公得志於殽可以已矣秦兵再至不修文告以卻之而逞志於再戰是主乎戰者也故言及蓋秦穆憤於敗而不能平晉襄狃於勝而不能屈血氣用事無理義以養其心終於稔怨結讎黷武殘民而已春秋書秦晉之戰所以為世

之不能懲忿窒慾者戒也

丁丑作僖公主

左

丁丑作僖公主書不時也

過葬十月故曰不時

公羊傳

作僖公主者何為僖公作主也

主天子長尺二寸諸侯長一尺

主者曷用虞主用桑

禮平明而葬日中而反虞以陽求陰謂之虞者親喪已下壙皇

皇無所親求而虞事之虞猶安神也用桑者取其名

與其羸猶所以副孝子之心禮虞祭天子九諸侯七

卿大夫五士三

練主用栗

謂期年練祭也埋虞主于兩階之間易用栗也夏后

氏以松殷人以柏周人以栗禮士虞記曰桑主不文
吉主皆刻而諡之蓋為禘祫時別昭穆也虞主三代

同者用意尚麤
摘未暇別也

用栗者藏主也

藏于廟室中堂

作僖公主何

以書譏何譏爾不時也其不時奈何欲久喪而後不

能也

禮作練主當以十三月文公亂制欲服喪三十月

月也

較梁

作為也為僖公主也立主喪主于虞吉主于練

此雖為練作之主終入廟以辨昭穆故傳以吉言之

作僖公主譏其後也

僖公薨至

此已十月

作主壞廟有時日子練焉壞廟壞廟之道易

擔可也改塗可也

禮親過高祖則毀其廟以次而達將納新神然作主在十三月壞廟

在三年喪終傳連言之
非謂作主壞廟同時也

作主常禮也何以書蓋喪主作於方葬之時吉主
作於小祥今僖公之薨已十有五月乃始作主慢
甚矣故書之譏不時也

三月乙巳及晉處父盟

因朝而盟始此

左傳晉人以公不朝來討公如晉夏四月己巳

經書三月乙巳

經傳必有誤

晉人使陽處父盟公以恥之書曰及晉處父

盟以厭之也

厭猶損也

適晉不書諱之也

公羊傳此晉陽處父也何以不氏諱與大夫盟也

殺梁傳不言公處父仇也為公諱也何以知其與公盟

以其日也何以不言公之如晉所恥也出不書反不致也

凡盟必書地其不地於晉也公在喪未朝天子而畏晉之威越禮朝晉晉侯乃使大夫盟公以辱之是以沒不書公諱之也齊晉霸業正盛時未嘗使諸侯受盟於其國魯閔公襄公童子侯也桓公出

盟閔公于落姑悼公出盟襄公于長檮不敢以非
禮加諸侯也而襄公乃使大夫盟公於國都故諸
侯懾於其勢而心不服此晉霸之所以易世而衰
與

夏六月公孫教會宋公陳侯鄭伯晉士穀盟于垂隴

穀

梁作穀垂隴公羊穀梁作垂斂杜注鄭地滎陽縣東
有隴城在今河南滎澤縣東北此外大夫書名之始

左傳公未至

朝晉未歸

六月穆伯會諸侯及晉司空士穀盟

于垂隴晉討衛故也書士穀堪其事也

晉司空非卿也
以士穀能

堪卿事
故書

陳侯為衛請成于晉執孔達以說

穀梁
傳

內大夫可以會外諸侯

大夫而敵諸侯於是始晉遂以大夫主諸侯也自
書士穀而後凡役書大夫大夫張也大夫之張君
使之也或疑當時君權尚尊非如襄昭之際大夫
專國然防微杜漸不可不謹也

自十有二月不雨至于秋七月

公羊
傳

何以書記異也大旱以災書此亦旱也曷為以

異書大旱之日短而云災

云言也
言有災

故以災書此不雨

之日長而無災故以異書也

穀梁傳

歷時而言不雨文不憂雨也不憂雨者無志乎

民也

不雨之月歷時而總書與僖公之每時一書不雨者異蓋僖公有閔雨之心文公無望雨之意也不雨止於七月則八月雨矣雨亦不書見不以民事繁憂樂也其怠於政事可知矣

八月丁卯大事于太廟躋僖公

左傳

秋八月丁卯大事于太廟躋僖公逆祀也于是夏

父弗忌為宗伯尊僖公且明見曰吾見新鬼大故鬼

小

新鬼僖公既為兄死時年又長故鬼
閔公死時年少弗忌明言其所見

先大後小順

也躋聖賢明也

又以僖公為聖賢

明順禮也君子以為失禮

禮無不順祀國之大事也而逆之可謂禮乎子雖齊

聖不先父食久矣

齊肅也臣繼君猶子繼父

故禹不先鯀湯不先

契

鯀禹父契湯十三世祖

文武不先不窋

不窋后稷子

宋祖帝乙鄭

祖厲王猶上祖也

帝乙微子父厲王鄭桓公父二國不以帝乙厲王不肖猶尊尚之

是以魯頌曰春秋匪解享祀不忒皇皇后帝皇祖后

稷

忒差也皇皇美也后帝天也詩頌僖公郊祭上天配以后稷

君子曰禮謂其后

稷親而先帝也

先稱帝也

詩曰問我諸姑遂及伯姊

詩卿風

君子曰禮謂其姊親而先姑也

僖親文公父夏父弗忘欲阿時君先其所

親故傳以此二詩深責其意

仲尼曰臧文仲其不仁者三不知者

三下展禽

展禽柳下惠也知其賢而使在下位

廢六關

塞關陽關之屬凡六所以禁絕

未游而廢之

妾織蒲

言與民爭利

三不仁也作虛器

謂居蔡山節藻稅也

有其器而無其位故曰虛

縱逆祀

聽夏父

祀爰居

海鳥曰爰居止于魯東門外文

仲以為神命國人祀之

三不知也

公羊傳

大事者何大禘也大禘者何合祭也其合祭奈

何毀廟之主陳于大祖

毀廟謂親過高祖毀其廟藏其主于大祖廟中陳者陳列

大祖前大祖東鄉昭南鄉穆北鄉其餘孫從王父父曰昭子曰穆昭取鄉明穆取北而尚敬

未毀

廟之主皆升合食于大祖

自外來曰升

五年而再殷祭

殷盛

也謂三年禘五年禘禘所以異于禘者功臣皆祭也

躋者何升也何言乎升僖

公譏何譏爾逆祀也其逆祀奈何先禰而後祖也

文公

以僖公為閔公庶兄升僖公于上失先後之義故譏之曰後祖者僖公以臣繼閔公猶子繼父故閔公于文公亦猶祖也

殺梁

傳 大事者何大是事也著禘嘗

禘合也嘗秋祭

禘祭者毀

廟之主陳于太祖未毀廟之主皆升合祭于太祖

祭禘

者合祭諸廟已毀未毀者之主于太祖廟中以昭穆為次序祭畢則復還其廟躋升也先親

而後祖也逆祀也逆祀則是無昭穆也無昭穆則是

無祖也無祖則無天也故曰文無天無天者是無天

而行也

謂天道先尊而後親今亂其上下不仰法天也

君子不以親親害尊

尊此春秋之義也

凡祭而失禮則書祭名祭非失禮為下事張本則稱事此大事于大廟蓋禘祭也禘者吉祭不言吉者主為逆祀書也閔僖二公昭穆雖同世而繼序有先後閔公弟也實為僖之君僖公兄也實為閔之臣入廟之主有定序僖不得先閔明矣今文公私於其父序兄弟畧君臣升僖之主於閔之上非禮甚矣公穀皆以大事為禘左傳無明文而杜預

以為禘公羊注又曰三年禘五年禘皆非也五年而再殷祭謂三年一禘五年再禘耳

冬晉人宋人陳人鄭人伐秦

左傳

冬晉先且居宋公子成陳轅選鄭公子歸生伐秦

取汪及彭衙而還以報彭衙之役卿不書為穆公故尊秦也謂之崇德

自入春秋至此惟魯大夫帥師以名見外師非君將恒稱人外大夫自士穀專盟始以名見陽處父

專將始以名見而餘猶稱人大夫雖張而未甚也
至晉秦結怨勦民報復無已則不待貶而惡見矣

公子遂如齊納幣

左傳襄仲如齊納幣禮也凡君即位好舅甥修昏姻娶

元妃以奉粢盛孝也

謂諒闇既終嘉好之事通于外
內外內之禮始備此除凶之即

位也孝禮之始也

公羊傳納幣不書此何以書譏何譏爾譏喪娶也娶在

三年之外則何譏乎喪娶三年之內不圖昏

僖公以
十二月

堯至此未滿二十五月又禮先納采問名納吉乃納幣此四者皆在三年之內故云爾

吉禘于

莊公譏然則曷為不于祭焉譏三年之恩疾矣

疾痛

非

虛加之也以人心為皆有之以人心為皆有之則曷

為獨于娶焉譏娶者大吉也非常吉也其為吉者主

于已以為有人心焉者則宜于此焉變矣

變者變慟哭泣也念

親者聞欲為已國皆則當變慟哭泣況乃至子納幣成昏哉

昏姻常事不書其書納幣者譏喪未終而圖昏也

婦姜之迎在四年夏喪服已畢何以譏之蓋事莫

重乎志故曰志哀而居約與之知喪逆婦雖在三
年外而納幣尚在喪期之內未祥而行嘉禮哀戚
忘矣志可問乎春秋此義使人抑情以去私其垂
教切矣

三年春王正月叔孫得臣會晉人宋人陳人衛人鄭人

伐沈沈潰

沈杜注姬姓國汝南平輿縣北有沈亭按漢志汝南治平輿故沈子國屬蔡州今河南汝

陽縣東南有平輿故城沈亭在其地

霸國大夫會諸大夫伐國自此始

左傳三年春莊叔會諸侯之師伐沈

莊叔即得臣

以其服于

楚也沈潰凡民逃其上曰潰在上曰逃

晉襄繼霸未嘗一出與諸侯會盟而使大夫主之
自伐衛而後軍政亦委之大夫其志益怠矣方是
時商臣有覆載不容之罪國人惡之使晉襄能伸
大義親帥諸侯以討楚則商臣不能自安楚人必
有因敵勢順衆心起而討賊改立君以聽命於諸
侯者如此則有光於桓文矣乃視非己事而使大
夫主兵伐其與國之小者商臣以是料晉之無能

為是以沈雖潰而圍江之師旋出也

附錄
左傳

衛侯如陳拜晉成也

二年陳侯為
衛請成于晉

夏五月王子虎卒

左傳

夏四月乙亥王叔文公卒來赴弔如同盟禮也

王子

虎與僖公同盟于翟泉文
公是同盟之子故赴以名

公羊傳

王子虎者何天子之大夫也外大夫不卒此何

以卒新使乎我也

穀梁傳

叔服也此不卒者也何以卒之以其來會葬我

卒之也或曰以其嘗執重以守也

傳二十四年天王出居于鄭叔服執

重任以守國

王子虎者穀梁以為即叔服然左氏於叔服稱內史於子虎稱王叔文公而後此星字入斗之時叔服復見於傳則非王子虎明矣踐土之役王子虎盟諸侯於王庭蓋天子之秉政者王臣無外交今死而赴告於魯故書以譏之

秦人伐晉

左傳 秦伯伐晉濟河焚舟

示必死也

取王官及郊

王官杜注晉地今山

西臨晉縣東南王官谷有廢壘即王官城也郊杜注晉地當為今臨晉平陽閭小邑

晉人不出

遂自茅津濟封穀尸而還

茅津杜注在河東大陽縣西今山西平陸縣南大陽

渡即茅津也有古茅城封埋藏之

遂霸西戎用孟明也君子是以知

秦穆公之為君也舉人之周也

周備也不偏以一惡棄其善

與人

之壹也

壹無二心

孟明之臣也其不解也能懼思也子桑

之忠也其知人也能舉善也

子桑公孫枝舉孟明者

詩曰予以

采繁于沼于沚予以用之公侯之事秦穆有焉

詩國風言

沼沚之藁至薄猶采以共夙夜匪解以事一人孟明

有馬

詩大雅

詒厥孫謀以燕翼子子桑有馬

詒遺也燕安也翼成

也詩大雅喻子桑有舉善之謀

舊說秦伯知過復貳故貶而稱人非也考之於經
惟戰韓稱秦伯蓋兩君親戰若書秦人則疑晉侯
見獲於秦大夫其餘終穆公之篇皆書秦人未有
稱爵者又謂晉人畏秦而不出秦伯逞其忿而後
悔自是見伐不報始能踐其自誓之言亦非也考

之傳記則踰二年而穆公卒何由知其自悔而不
報乎先儒曲生義例謂聖人以常情待晉襄以王
事責秦穆皆因書錄秦誓謂孔子以穆公為賢不
知誓詞有足為天下後世法者故不廢其言至其
窮兵報怨則備書於春秋以著其罪猶化工賦物
生殺並行而不相悖也

秋楚人圍江

左傳 楚師圍江晉先僕伐楚以救江

自齊桓之霸江黃以近楚之國並從齊盟楚深憾之滅黃已久今復圍江亦以晉不能合諸侯以討其弑逆之罪故輕視中國而圍江以試之也

雨螽于宋

左傳秋雨螽于宋隊而死也

公羊傳雨螽者何死而墜也何以書記異也外異不書

此何以書為王者之後記異也

穀梁傳外災不志此何以志也曰災甚也其甚奈何茅

茨盡矣

茅茨猶盡則嘉穀可知茨蒺藜

著于上見于下謂之雨

雨自上而下者也螽不見其所從來自上而下衆

多如雨異之大者也

冬公如晉十有二月己巳公及晉侯盟

此書公如晉之始

左傳

晉人懼其無禮于公也請改盟

改二年處父之盟

公如晉

及晉侯盟晉侯饗公賦菁菁者莪

詩小雅義取既見君子樂且有儀

莊叔以公降拜

謝具以公比君子也

曰小國受命于大國敢不

慎儀

賦詩曰樂且有儀故答以敢不慎儀

君貺之以大禮何樂如之抑

小國之樂大國之惠也晉侯降辭

降階辭讓公

登成拜

俱還

上成拜禮

公賦嘉樂

嘉樂詩大雅義取顯顯令德宜民宜人受祿于天

晉人懼無禮而請改盟於公為不辱故適晉書而

反國亦致不書地盟於晉都也

晉陽處父帥師伐楚以救江

公羊穀梁無以字外大夫書帥師自此始

左傳

冬晉以江故告于周王叔桓公晉陽處父伐楚以

救江

桓公周卿士王叔文公之子不書不親伐也

門于方城遇息公子朱

而還

子朱楚大夫伐江之帥也聞晉師起而江兵解故晉亦還

公羊傳

此伐楚也其言救江何為諼也

諼詐

其為諼奈何

伐楚為救江也

救人之道當指其所之實欲救江而反伐楚以為其勢必當引圍江兵還

自救也

故云爾

殺梁傳

此伐楚其言救江何也江遠楚近伐楚所以救

江也

大夫帥師以名氏見大夫彊也春秋於侵伐多不言所事此書伐以救何言救江雖善而所以救之者非其道也是時楚商臣負弑逆之罪恃彊凌弱

晉襄不能大合諸侯奉詞伐罪而獨遣一軍又不
敢徑造江之城下而聲言伐楚一遇子朱即避之
而返既不能伐楚又不能救江畏怯甚矣故特起
伐以救之文以罪之以者不以者也

四年春公至自晉

附錄
左傳

四年春晉人歸孔達于衛以為衛之良也故免

之

二年衛執孔
達以說晉

夏衛侯如晉拜

謝歸
孔達

曹伯如晉

會正

會受貢賦之政也傳言襄公
能繼文之業而諸侯服從

夏逆婦姜于齊

左傳

逆婦姜于齊卿不行非禮也

禮諸侯有故則使卿逆

君子是

以知出姜之不允于魯也

文公薨而見出故曰出姜允信也始來不見尊貴故

終不為國人所敬信也

曰貴聘而賤逆之

公子遂納幣是貴聘也

君而卑

之

君小君也

立而廢之棄信而壞其主

主內主也

在國必亂在

家必亡不允宜哉詩曰畏天之威于時保之敬主之

謂也

詩頌言畏天威于是保福祿為十八年姜氏歸齊張本

公羊傳

其謂之逆婦姜于齊何略之也

謂不書逆者之姓名不言如齊

不稱女不書至也

高子曰娶乎大夫者略之也

謂夫人乃齊大夫女賤不

可奉宗廟

故略之

穀梁傳

其曰婦姜為其禮成乎齊也

昏禮成于齊故在齊便稱婦

其

逆者誰也親逆而稱婦或者公與何其速婦之也

怪稱

婦速故設為問辭而反覆推之

曰公也其不言公何也非成禮于齊

也

非責

曰婦有姑之辭也其不言氏何也貶之也何為

貶之也夫人與有貶也

夫人能以禮自防則夫婦之禮不成于齊故譏公而夫人

與焉

納幣卿行則逆婦必非微者穀梁謂公自逆是也
未至而稱婦則成禮于齊明矣圖昏於喪期之內
又成禮於婦家所謂失禮之中又失禮也故諱不
書公以示貶

狄侵齊

春秋霸業之盛首推桓文以其攘外而安內也狄
雖敗於箕未幾復侵齊春秋書之譏晉襄無攘却
之謀而齊霸不紹也

秋楚人滅江

左傳 楚人滅江 秦伯為之降服 出次不舉 過數

降服素服也出

次辟正寢不舉去盛饌鄰國之禮有數今秦伯過之 大夫諫公曰同盟滅

秦江同盟

不告故 雖不能救 敢不矜乎 吾自懼也 君子曰詩云

惟彼二國 其政不獲 惟此四國 爰究爰度 其秦穆之

謂矣

詩大雅爰于也究度皆謀也言夏商之君政不得人心故四方諸侯皆懼而謀度其政事喻秦

穆亦能感江之滅懼而思政也

春秋中以慕義從霸遂致滅亡者江與黃是也當

桓之世黃為楚滅齊不能救君子憫之江被圍經
年晉霸不競不能撼楚以庇江春秋書圍書滅著
晉襄之無遠謀見江上下同力效死乃亡國之善
辭也不書奔死社稷也

晉侯伐秦

左傳秋晉侯伐秦圍祁新城

祁杜注秦邑在今陝西澄城縣境新城杜注秦邑今

澄城縣東北有古新
城即梁國之新里也

以報王官之役

王官役
在三年

晉襄以王官之役不報為恥未若商臣得志於江

為恥之大也報秦而不誅商臣末矣况救江則遣大夫伐秦則君親之故書晉侯伐秦於滅江之下見其急於修怨而緩於恤患也爵晉侯非善之以其徇私亟戰而不知戢故目其人而責之

衛侯使甯俞來聘

左傳衛甯武子來聘公與之宴為賦湛露及彤弓

非禮之常

公特命樂人以示意故言為賦湛露彤弓詩小雅

不辭又不答賦使行人私

焉

私問之

對曰臣以為肄業及之也

肄習也以魯人失所賦故佯為不知

昔諸侯朝正于王

朝而受政教也

王宴樂之于是乎賦湛露

則天子當陽諸侯用命也

詩云湛湛露斯匪陽不晞乾也言露見日而乾猶

諸侯稟天子命而行

諸侯敵王所愾而獻其功

敵猶當也愾猶恨怒也

王于

是乎賜之彤弓一彤矢百玃弓矢千以覺報宴

覺明也謂

諸侯有四夷之功王賜之弓矢又為歌彤弓以明報功宴樂

今陪臣來繼舊好

因論

天子之樂故自稱陪臣

君辱貺之其敢干大禮以自取戾

貺賜也干

犯也戾罪也解已所以不辭亦不答之意

禮諸侯歲相問殷相聘殷衆也殷見曰同十有二

年五服盡朝故曰殷見殷見既畢諸侯更遣大夫以交於鄰邦謂之殷聘今殷見則亡而殷聘則存聖人書之以傷周道也

冬十有一月壬寅夫人風氏薨

左傳冬成風薨為明年王使歸舍贈傳

春秋正名定分之書也仲子不稱夫人稱夫人自風氏始春秋記其卒葬各以實書不為異辭者謹禮之所由變也

日講春秋解義卷二十三

欽定四庫全書

日講春秋解義卷二十四

文公

五年春王正月王使榮叔歸舍且賵

左傳五年春王使榮叔來舍且賵

榮叔天子之上大夫榮采地叔字也

公羊傳

舍者何口實也

孝子所以實親口也緣生以事死不忍虛其口天子以珠諸侯

以玉大夫以碧士以貝

其言歸舍且賵何兼之兼之非禮也

殺梁

舍一事也賵一事也兼歸之非正也其曰且志

兼也其不言來不周事之用也賵以早

乘馬曰賵所以助葬成風

未葬故言早

而含已晚

已殯故言晚

春秋繫王於天以履天位治天職所惇庸者天叙
天秩所刑賞者天命天討文公以風氏之喪訃於
王非禮也王不能正反歸含賵失天理矣故特不
稱天言弗克若天也

三月辛亥葬我小君成風

公羊傳

成風者何僖公之母也

成風書葬是祔於姑也隱公時仲子猶別立宮以
祀今則儼然並尊又私諡焉亂禮甚矣書其實以
示譏也

王使召伯來會葬

召伯殺梁
作毛伯

左

召昭公來會葬

召采地伯爵
天子卿也

禮也

成風莊公之妾
母以子貴故曰

禮

殺梁
傳

會葬之禮于鄙上

鄙竟也為送葬來
故從竟至墓上

王臣下聘桓公宰糾書名示貶而大夫再聘則書

字從同也今王以夫人之禮喪成風再不稱天何也薨而贈舍尚曰不可又使卿來會葬將祔之於廟則其事益隆失益甚矣故復去天以示義

夏公孫敖如晉

王舍且贈又使卿來會葬禮莫隆焉不往謝而亟如晉慢王尊霸不貶而惡見矣

秦人入郤

左傳初郤叛楚即秦又貳于楚夏秦人入郤

郤介秦楚之間商臣弑逆郤叛楚而即秦以穆公
為可恃也及楚滅江懼而貳於楚秦不能庇郤乃
稱兵以入之而其後郤卒為楚所并王政不行小
國之無罪而就滅亡如此可哀也夫

秋楚人滅六

六杜注六國廬江六縣
在今江南六安州北

左傳六人叛楚即東夷秋楚成大心仲歸帥師滅六

仲歸

子家

冬楚公子變滅蓼

蓼杜注蓼國安豐縣今河
南固始縣東北蓼城崗即其

地

臧文仲聞六與蓼滅曰皋陶庭堅不祀忽諸

蓼與
六皆

皋陶後也庭
聖皋陶字

德之不建民之無援哀哉

邾滅須句楚滅六蓼皆世變之大者須句司大皞
之祀六蓼實皋陶之後上古建國歷唐虞三代絛
延不絕入春秋而後蕩滅無遺蓋不獨周綱解紐
自古聖王之政教至是而盡廢故不足以相維持
也

冬十月甲申許男業卒

附錄
左傳

晉陽處父聘于衛反過甯甯羸從之

甯杜注晉
邑汲郡修

武縣今河南獲嘉縣西北有故城羸逆旅大夫及溫而還其妻問之羸曰以

剛商書曰沈漸剛克高明柔克

沈漸猶滯弱也高明猶亢爽也言各當以

剛柔勝已本性乃能成全也此在洪範今謂之周書

夫子壹之

謂純任剛也

其不沒

乎天為剛德猶不干時

寒暑相順

況在人乎且華而不實

言過其行

怨之所聚也犯而聚怨

剛則犯人

不可以定身余懼

不獲其利而離其難是以去之

離麗也為六年晉殺處父傳

晉

趙成子

趙衰新上軍帥中軍佐也

欒貞子

欒枝下軍帥也

霍伯

先且居中軍帥也

臼季

胥臣下軍佐也

皆卒

為六年蒐于夷傳

六年春葬許僖公

附錄左傳

六年春晉蒐于夷舍二軍

僖三十一年晉蒐清原作五軍今舍二軍

復三軍之制夷杜注晉地前年四卿卒故蒐以謀軍帥

使狐射姑將中軍

代先且居

趙盾佐之

代趙衰也盾趙衰子

陽處父至自溫

往年聘衛過溫今始至改

蒐于董

董杜注河東汾陰縣有董亭在今山西聞喜縣東北接絳州界

易中軍

易以趙盾

為帥射姑佐之

陽子成季之屬也

處父嘗為趙衰屬大夫

故黨于趙氏

且謂趙盾能曰使能國之利也是以上之宣子于是

乎始為國政

宣趙盾諡

制事典

典常也

正法罪

輕重當

辟刑獄

辟猶理也

董逋逃

董督也

由質要

由用也質要券契也

治舊滂

治理本滂職

秩禮

貴賤不失其本

續常職

修廢官

出滯淹

拔賢能也

既成以授大

傅陽子與大師賈佗使行諸晉國以為常法

賈佗以公族從

文公而不在五人之数

夏季孫行父如陳

左傳

臧文仲以陳衛之睦也欲求好于陳夏季文子聘

于陳

季文子即行父季友之孫

且娶焉

季友以原仲之舊如陳者再今行父之往蓋因其

祖舊好假公室之聘而圖婚耳韓侯因朝而娶詩
列大雅則於禮無譏故經但以出聘書而不及其
私與友之葬原仲異也

附錄
左傳

秦伯任好卒

任好秦穆公名

以子車氏之三子奄息仲

行鍼虎為殉

子車秦大夫氏也
以人從葬為殉

皆秦之良也國人哀

之為之賦黃鳥

黃鳥詩秦風義取黃鳥止于棘
秦往來得其所傷三良不然

君子

曰秦穆之不為盟主也宜哉死而棄民

善人者民之
望也殺以殉

葬是棄
民望

先王違世猶詒之法而況奪之善人乎詩曰

人之云亡邦國殄瘁

詩大雅言善人亡則國瘁病

無善人之謂若

之何奪之古之王者知命之不長是以竝建聖哲

建立

聖知以司牧民

樹之風聲

因土地風俗為立聲教之法

分之采物

旌旗衣服各有

制著之話言

話善言也為作善言遺戒

為之律度

鍾律度量所以治歷明時

陳

之藝極

藝準也極中也貢獻多少之法傳曰貢之無藝又曰貢獻無極

引之表儀

引導

也表儀猶威儀

予之法制告之訓典

訓典先王之書

教之防利

防惡興利

委之常秩

委任也常秩官司之常秩

道之以禮則使毋失其土宜

衆隸賴之而後即命

即就也

聖王同之今縱無法以遺

後嗣而又收其良以死難以上矣君子是以知秦

之不復東征也

不能復征東方諸侯為霸主

秋季孫行父如晉

左傳

秋季文子將聘于晉使求遭喪之禮以行

聞晉侯疾故

其人曰將焉用之

其人從者

文子曰備豫不虞古之善教

也求而無之實難

難卒得

過求何害

王制諸侯比年一小聘三年一大聘五年一朝文公即位六載未嘗一如京師而朝晉者再且數遣

聘問知霸主而不知有王比事以觀罪可見矣

八月乙亥晉侯驩卒

驩公羊作謹

左傳八月乙亥晉襄公卒靈公少晉人以難故欲立長

君趙孟曰

趙孟趙盾也

立公子雍

公子雍文公之襄公庶弟杜祁之子

好善

而長先君愛之且近于秦秦舊好也置善則固事長

則順立愛則孝結舊則安為難故故欲立長君有此

四德者難必抒矣

抒除也

賈季曰不如立公子樂

樂文公子

懷贏所出

辰嬴嬖于二君

辰嬴即懷贏二君懷公文公也

立其子民必安

之趙孟曰辰嬴賤班在九人

班位也

其子何震之有

震風

也且為二嬖淫也為先君子不能求大而出在小國

辟也母淫子辟無威陳小而遠無援將何安焉杜祁

以君故讓偁姑而上之

杜祁杜伯之後祁姓也偁國名姑偁姓女生襄公為世子

故杜祁讓使在己上以狄故讓季隗而己次之故班在四

以季隗是

文公處狄時妻故復讓之

先君是以愛其子而仕諸秦為亞卿焉

言其賢故位尊

秦大而近足以為援母義子愛足以威民立

之不亦可乎使先蔑士會如秦逆公子雍

先蔑士伯也士會隨

季也

賈季亦使召公子樂于陳趙孟使殺諸郕

郕杜注
晉地今

河南濟源縣
西有郕亭

冬十月公子遂如晉葬晉襄公

左傳

冬十月襄仲如晉葬襄公

禮諸侯五月而葬今三月不及期非禮也又禮諸
侯之喪士弔大夫送葬及晉文昉為霸令使大夫
弔卿共葬事故襄仲以卿往會亦非禮也

晉殺其大夫陽處父晉狐射姑出奔狄

射殺梁
作夜

左傳

賈季怨陽子之易其班也

本中軍帥易以為佐

而知其無援

于晉也

少族多怨

九月賈季使續鞠居殺陽處父

鞠居狐氏之族

書曰晉殺其大夫侵官也

君已命帥處父易之故曰侵官

十一月

丙寅晉殺續簡伯

討其殺處父簡伯續鞠居十一月無丙寅丙寅十二月八日也日月

必有誤

賈季奔狄宣子使史駢送其帑

史駢趙盾屬大夫駢妻子也宣

子以賈季佐中軍同官故

夷之蒐賈季戮史駢

戮辱也

史駢之人欲

盡殺賈氏以報焉史駢曰不可吾聞前志有之曰敵

惠敵怨不在後嗣忠之道也

敵猶對也若及子孫則為非對是遷怒也

夫

子禮於賈季我以其寵報私怨無乃不可乎介人之

寵非勇也

介目也

損怨益仇非知也

殺季家欲以除怨宣子將復怨已是

益仇以私害公非忠也釋此三者何以事夫子盡具其

帑與其器用財賄親帥扞之送致諸竟

扞衛也

公羊傳

晉殺其大夫陽處父則狐射姑曷為出奔射姑

殺也射姑殺則其稱國以殺何君漏言也其漏言奈

何君將使射姑將

謂作中軍大夫

陽處父諫曰射姑民衆不說

不可使將于是廢將陽處父出射姑入君謂射姑曰

陽處父言曰射姑民衆不說不可使將射姑怒出刺陽處父于朝而走

殺梁傳

稱國以殺罪累上也襄公已葬其以累上之辭

言之何也君漏言也上泄則下闇下闇則上聾且闇且聾無以相通

臣闇不言君無所聞上下否塞

夜姑殺者也夜姑之

殺奈何曰晉將與狄戰使狐夜姑為將軍趙盾佐之陽處父曰不可古者君之使臣也使仁者佐賢者不使賢者佐仁者今趙盾賢夜姑仁其不可乎

賢者多才也戰

主攻伐仁者有惻隱之心不如多才者有權畧

襄公曰諾謂夜姑曰吾始使

盾佐女今女佐盾矣

稱處父語以語之故傳曰漏言也

夜姑曰敬諾

襄公死處父主竟上事

待諸侯會葬在鄰上

夜姑使人殺之君

漏言也故士造辟而言詭辭而出

辟君也言與君言出則詭辭不以實

告人

曰用我則可不用我則無亂其德

此士對君言之辭

凡君與臣同殺則稱國今射姑實殺處父而罪累上者見人君以公正之道進退其臣人自心服無所歸咎襄公乃漏言於射姑嫁怨於處父雖非身

殺之而以失言殺之等殺耳故襄公已卒而書國
殺所以為後世戒也

閏月不告月猶朝于廟

左傳

閏月不告朔非禮也

經稱告月傳稱告朔明告月必以朔

閏以正時

四時漸差則置閏以正之

時以作事

順時命事

事以厚生

事不失時則年豐而民生

厚

生民之道於是乎在矣不告閏朔棄時政也何以

為民

為治也

公羊傳

不告月者何不告朔也

禮諸侯受十二月朔政于天子藏于祖廟每月

朔朝廟使大夫南面奉天子命君北面
而受之比時使有司先告朔謹之至也
曷為不告朔

謂不言朔而言月
天無是月也閏月矣何以謂之天無是月

非常月也猶者何通可以已也
朝者因視朔政兩無政而朝故曰猶不言

朔者閏月無告朔禮也

穀梁傳
不告月者何也不告朔也不告朔則何為不言

朔也閏月者附月之餘日也積分而成于月者也
歲一

三百六十日餘六日又有小月六積五歲約得六十日而再閏積衆月之餘分以成此月
天子不

以告朔而喪事不數也
閏是叢殘之數非月之正故吉凶大事皆不用也
猶

之為言可以已也

告朔然後朝廟既廢其大而行其細故譏之

諸侯月朔告於廟謂之告朔因以聽治此月之政
謂之視朔不告月者不告朔也因月之虧盈置閏
是主乎月而有閏也故不言朔而言月在禮天子
閏月聽朔於明堂閏者所以定四時成歲天子以
為月而頒之諸侯不奉以告是輕正朔慢時令也
況一月之內百官修政於朝庶民服事於野閏雖
無常而政有常安得不告猶朝於廟者幸其不已

之詞也

七年春公伐邾

左傳

七年春公伐邾聞晉難也

公因霸國有難而侵小

三月甲戌取須句遂城郛

句公羊作胸郛杜注魯邑卞縣南有郛城在今山東泗水

縣東南

左傳

三月甲戌取須句

須句魯封內屬國僖公反其君之後邾復滅之

寘文公

子焉

邾文公子叛邾在魯故使為守須句大夫

非禮也

絕大諱之祀以與鄰國叛臣故曰非

禮

公羊傳 取邑不日此何以日內辭也使若他人然據昭三十

二年正月取閭亦邦妻之邑未嘗書日今以日為內辭者使若公春伐邾妻而去他人自以甲戌日取之所以深諱其貪利取邑也然僖公嘗伐邾取須朐矣何以不為內辭哉公羊之說非也

穀梁傳 取邑不日此其日何也不正其再取故謹而日

之也僖二十二年公已伐邾取須句過而不改故錄日以志之然非也設不日則聽其取已乎

遂繼事也因伐邾之師

晉襄既卒國未立君公乘其閒伐邾取邑絕大皐之祀俾邾之叛臣守之貪土地而舍逋逃又重勞

民力城內邑以防邦師之至心有慊焉故畏鄰國之伐而不知愈重其過耳

夏四月宋公王臣卒

王臣穀梁作壬臣

宋人殺其大夫

左傳

夏四月宋成公卒于是公子成為右師

莊公

公孫

友為左師

目夷子

樂豫為司馬

戴公

鱗臯為司徒

桓公

公子蕩為司城

桓公子也以武公名廢司空為司城

華御事為司寇

華元

父也傳言六卿皆公族昭公不親信之所以致亂

昭公將去羣公子

成公卒其弟禦

殺世子而自立國人殺樂而立其少子梓曰是為昭公

樂豫曰不可公族公室

之枝葉也若去之則本根無所庇廕矣葛藟猶能庇

其本根故君子以為比

詩人取以喻九族兄弟

況國君乎此諺

所謂庇焉而縱尋斧焉者也

縱放也尋即將尋斧柯之尋

必不可

君其圖之親之以德皆股肱也誰敢攜貳若之何去

之不聽穆襄之族率國人以攻公

穆公襄公之子孫昭公所欲去者

殺公孫固公孫鄭于公宮

二子在公宮故為亂兵所殺

六卿和公

室樂豫舍司馬以讓公子印

印昭公弟

昭公即位而葬書

曰宋人殺其大夫不稱名衆也且言非其罪也

殺者衆故

名不可知死者無罪則例不稱名

公羊傳

何以不名

成公十五年秋宋殺其大夫山稱名

宋三世無大夫三

世內娶也

校梁傳

稱人以殺誅有罪也

臣以權寵逼君故言有罪

成公在殯昭公首為亂階至使公族構難大夫罹殃經書宋人以著國亂無政而昭公之不君亦可見矣

戊子晉人及秦人戰于令狐晉先蔑奔秦

蔑公羊作昧奔上有以師

字

左傳

秦康公送公子雍于晉曰文公之入也無衛故有

呂卻之難

在僖二十四年

乃多與之徒衛穆嬴日抱大子以

啼于朝曰

穆嬴襄公夫人室公母也

先君何罪其嗣亦何罪舍適

嗣不立而外求君將焉寘此出朝則抱以適趙氏頓

首于宣子曰先君奉此子也而屬諸子曰此子也才

吾受子之賜不才吾唯子之怨今君雖終言猶在耳

而棄之若何宣子與諸大夫皆患穆羸且畏偏

畏國人以

大義來通已

乃背先蔑而立靈公

初使先蔑逆子雍故言背靈公大子夷皋也

以禦秦師箕鄭居守趙盾將中軍先克佐之

克先且居子代

狐射姑

荀林父佐上軍

箕鄭將上軍居守故佐獨行

先蔑將下軍先

都佐之步招御戎戎津為右及堇陰

先蔑士會逆公子雍前還晉晉

人始以逆雍出軍故蔑猶在職堇陰杜注晉地

宣子曰我若受秦秦則賓也

不受寇也既不受矣而復緩師秦將生心先人有奪

人之心軍之善謀也逐寇如追逃軍之善政也訓卒

利兵秣馬尊食潛師夜起

尊食早食于寢尊也

戊子敗秦師于

令狐至于刳首

刳首杜注令狐在河東與刳首相接按令狐今山西猗氏縣地刳首當在

今榮河臨晉間

己丑先蔑奔秦士會從之先蔑之使也荀林

父止之曰夫人大子猶在而外求君此必不行子以疾辭若何不然將及攝卿以往可也何必子同官為

寮吾嘗同寮敢不盡心乎弗聽為賦板之三章

板詩大雅

其三章義取易羌之言猶不可忽況同寮乎僖二十八年林父將中行先蔑將左行

又弗聽及

亡荀伯盡送其帑及其器用財賄于秦

荀伯林父

曰為同

寮故也士會在秦三年不見士伯

士伯先蔑

其人曰能亡

人于國

言能與人俱亡于晉國

不能見于此焉用之

何用如此

士季

曰

士季士會

吾與之同罪非義之也

言已非慕先蔑之義而從之

將何

見焉及歸遂不見

責先蔑為正卿而不匡諫且俱出奔恐有黨也士會歸在十三年

公羊傳

晉先昧以師奔秦此偏戰也何以不言師敗績

敵也此晉先昧也其稱人何貶曷為貶外也其外奈

何以師外也

懷持二心有功欲還無功便持師出奔故于戰貶之

何以不言出

遂在外也

言從竟外去

殺梁

不言出在外也輟戰而奔秦以是為逃軍也

止

也為將而獨

奔故曰逃軍

晉人舍適嗣而外求君其始已失及畏偏立君不知以禮謝秦而悍然興戎掩其不備蓋晉人為志乎是戰也言戰不言敗勝負敵也先蔑之奔不言出明自軍中去也

狄侵我西鄙

左

狄侵我西鄙公使告于晉趙宣子使因賈季問鄆

舒且讓之

時賈季奔在狄鄆舒狄相

鄆舒問于賈季曰趙衰趙盾

孰賢對曰趙衰冬日之日也趙盾夏日之日也

冬日可愛

夏日

可畏

魯嘗患戎未嘗患狄蓋狄遠魯且懾晉也至是晉
構秦難不在諸侯魯聞之而近伐邾狄亦聞之而
遠侵魯春秋書此罪魯之不自正而晉業之替亦
見矣

秋八月公會諸侯晉大夫盟于扈

扈杜注鄆地滎陽卷縣西北有扈亭在今

河南原武縣西北

左傳 秋八月齊侯宋公衛侯陳侯鄭伯許男曹伯會晉

趙盾盟于扈晉侯立故也公後至故不書所會凡會

諸侯不書所會

謂不具列公侯及卿大夫

後也後至不書其國辟

不敏也

不敏猶不達也諸國皆在公獨後是不達于事此傳自釋凡例之意

公羊傳

諸侯何以不序大夫何以不名公失序也公失

序奈何諸侯不可使與公盟眖晉大夫使與公盟也

以目通指曰眖文公內則喪娶逆祀外則貪利取邑為諸侯所薄賤故不見序

穀梁傳

其曰諸侯畧之也

以大夫主盟諸侯自會扈始趙盾初立靈公專執
晉政彊會八國之君而自主盟若晉無君然故諸
侯不序而趙盾不名所以著大夫之專也

冬徐伐莒

徐僭號即戎厥後自進於中國數從會伐經皆稱
人以其能附中國也今以中國無霸興兵伐莒故
復以號舉

公孫敖如莒泣盟

泣公羊穀
梁作蒞

左傳 穆伯娶于莒曰戴已生文伯其娣聲已生惠叔

伯穆

公孫敖也文伯
殺也惠叔難也

戴已卒又聘于莒莒人以聲已辭則

為襄仲聘焉

襄仲公子遂
教從父昆弟

冬徐伐莒莒人來請盟

伐見

故欲
結援

穆伯如莒泣盟且為仲逆及鄆陵

鄆陵杜
注莒邑

登城

見之美自為娶之仲請攻之公將許之叔仲惠伯諫

曰

惠伯叔
牙孫

臣聞之兵作于內為亂于外為寇寇猶及

人亂自及也今臣作亂而君不禁以啟寇讎若之何

公止之惠伯成之

平二子

使仲舍之

舍不娶

公孫敖反之

還莒女

復為兄弟如初從之

為明年公孫敖奔莒傳

殺梁

蒞位也其曰位何也前定也其不日前定之盟

不日也

以徐伐莒而往蒞盟嫌非兩國交盟之例故明之

莒為徐所伐故來求援請修洮之盟而敖因盟莒

以代弟逆婦且為不道經弟書蒞盟所謂春秋書

王法不誅其人身也

附錄左傳

晉卻缺言于趙宣子曰日衛不睦故取其地

往日

日元年晉伐衛取戚田

今已睦矣可以歸之叛而不討何以示

威服而不柔何以示懷非威非懷何以示德無德何以主盟子為正卿以主諸侯而不務德將若之何夏書曰戒之用休董之用威勸之以九歌勿使壞九功之德皆可歌也謂之九歌六府三事謂之九功水火金木土穀謂之六府正德利用厚生謂之三事義而行之謂之德禮德正德也禮以制財用之節又以厚生民之命無禮不樂所由叛也若吾子之德莫可歌也其誰來之盍使睦者

歌吾子乎宣子說之

為明年晉歸鄭衛田張本

八年春王正月

附錄左傳

八年春晉侯使解揚歸匡戚之田于衛

解揚晉大夫匡

本衛邑中屬鄭孔達伐不能克今晉令鄭還衛地歸所取戚田

且復致公壻池之封

自申至于虎牢之竟

公壻池晉君女壻舊取衛地以封之今鄭還衛也申杜注鄭地

當在今河南

池水縣界

夏四月

附錄左傳

夏秦人伐晉取武城以報令狐之役

令狐役在七年

秋八月戊申天王崩

左 秋襄王崩

子頃王壬臣立為公孫叔如周弔傳

冬十月壬午公子遂會晉趙盾盟于衡雍

左 傳 晉人以扈之盟來討

前年盟扈公後至

冬襄仲會晉趙

孟盟于衡雍報扈之盟也

乙酉公子遂會雒戎盟于暴

公羊作伊雒戎暴杜注鄭地

左 傳 遂會伊雒之戎

伊雒之戎將伐魯公子遂不及復君故專命與之盟

書曰公

子遂珍之也

珍貴也

翟泉之盟猶有王人及魯公蒞焉以大夫而專會盟自衡雍始其後趙盾仲遂皆為弑君之賊而有後於魯晉三桓專魯六卿分晉其兆早見於斯矣遂既盟趙盾四日又盟維戎而再以名見不書遂會蓋以二事出皆有公命左氏之說非也

公孫敖如京師不至而復丙戌奔莒

公羊無而字

左傳穆伯如周弔喪不至以幣奔莒從己氏焉

己氏莒女

公羊傳不至復者何不至復者內辭也不可使往也

安居

不肯行故諱使若已行但不至而還用

不可使往則其言如京師何遂

公意也

正其義不使君命壅塞

何以不言出

據慶父言出奔

遂在外也

諱使若從外來不敢復還者也

穀梁傳

不言所至未如也

若其已行當如公子遂至黃乃復今不言所至而直言復

知其實未如也

未如則未復也未如而曰如不廢君命也

受命

而出義無私留書如京師以顯命行于下不書所至以表不去之罪

未復而曰復不專

君命也

復者事畢之辭未如故知其未復加其事之文者言君命無輒專之道

其如非

如也其復非復也唯奔莒之為信故謹而日之也

還者事畢復者事未畢也禮君言不宿於家况赦
受命以赴天王之喪廢君命而徒返無王無君罪
莫甚焉文公既不加誅又不再使卿往亦罪也不
言所至者舉京師為重也不言出受命矣自外出
也

蝨

蝨公羊
作蝨

宋人殺其大夫司馬宋司城來奔

左傳

宋襄夫人襄王之姊也昭公不禮焉

昭公適
祖母

夫人

因戴氏之族

華樂皇皆戴族

以殺襄公之孫孔叔公孫鍾離

及大司馬公子卬皆昭公之黨也司馬握節以死故

書以官

節國之符信也握之以死示不廢命

司城蕩意諸來奔效節于

府人而出

效猶效也意諸公子蕩之孫

公以其官逆之皆復之

卿連

從大夫公賢其效節故以本官逆之諸宋而復之司城官屬悉來奔故言皆復

亦書以官皆

貴之也

公羊傳

司馬者何司城者何皆官舉也

皆以官名舉言之

曷為

皆官舉

據宋殺其大山不官舉

宋三世無大夫三世內娶也

宋以

內娶三世妃黨爭權相殺
主或不知所任故舉其官

殺梁

司馬官也其以官稱無君之辭也 司城官也

其以官稱無君之辭也來奔者不言出舉其接我也
殺其大夫志亂也二人皆以官舉見主兵者不能
其官至於見殺守土者不能其官至於出奔故以
其官責之而宋國無政昭公之不能定位已於此
見其端兆矣

附錄

夷之蒐晉侯將登箕鄭父先都

登之于上軍也
夷蒐在六年

而使士穀梁益耳將中軍

士穀本司空

先克曰狐趙之勲

不可廢也

狐偃趙衰有從亡之勲

從之先克奪蒯得田于董陰

七年晉禦秦師于董陰以軍事奪其田也先克中軍佐

故箕鄭父先都士穀梁

益耳蒯得作亂

著五人作亂之由為明年殺先克張本

九年春毛伯來求金

來求止此

左傳毛伯衛來求金非禮也

天子不私求財故曰非禮

不書王命未

葬也

公羊傳毛伯者何天子之大夫也何以不稱使當喪未

君也踰年矣何以謂之未君

喪王崩在八年踰年當即位

即位矣

而未稱王也未稱王何以知其即位以諸侯之踰年

即位亦知天子之踰年即位也

俱繼體其禮不得異

以天子三

年然後稱王亦知諸侯于其封內三年稱子也

各信愚于

其下踰年稱公矣則曷為于其封內三年稱子緣民臣

之心不可一日無君緣終始之義一年不二君

故君薨稱

子某既葬稱子明繼體以繫民臣之心

不可曠年無君

故踰年稱公

緣孝子

之心則三年不忍當也

孝子三年志在思慕不忍當父位故雖即位猶于其封內

三年毛伯來求金何以書譏何譏爾王者無求求金

稱子非禮也然則是王者與

據未稱王

曰非也非王者則曷為

謂之王者王者無求曰是子也繼文王之體守文王

之法度文王之法無求而求故譏之也

引文王者文王始受命制

法度

穀梁傳求車猶可求金甚矣

求俱不可在喪尤甚

公孫教既不至京師魯遂不供天子之喪故毛伯

來風魯以求金何以不稱使當喪未君也冢宰不

能制國用而下求諸侯不貢而致王求皆非也自
是以後魯不修貢而王亦無求矣

夫人姜氏如齊

二月叔孫得臣如京師

穀梁傳

京大也師衆也言周必以衆與大言之也

辛丑葬襄王

左傳

二月莊叔如周葬襄王

莊叔即得臣

公羊傳

王者不書葬此何以書不及時書過時書我有

往者則書

殺梁

天子志崩不志葬舉天下而葬一人其道不疑

也志葬危不得葬也

不得備禮葬

日之甚矣其不葬之辭

也

王室微弱諸侯無復往會葬

前年公子遂如晉葬襄公今此得臣如京葬襄王

是夷周於晉也

晉人殺其大夫先都

左

九年春王正月己酉使賊殺先克

箕鄭等所使也不赴故不書

乙丑晉人殺先都梁益耳

乙丑正月十九日
經書二月從告

三月夫人姜氏至自齊

殺梁
傳

卑以尊致病文公也

夫人行例不致乃以
君禮致刺公寵之過

夫人與君敵體然適他國未有致之者則其行非
禮以不致見其罪也此書致以歸寧告廟得其正
也歸寧常事爾宜不書然不一書則終無以著其
正故於出姜之至見之又歸寧雖常事而出姜之
歸寧以不安於魯而歸告於父母則非常也

晉人殺其大夫士穀及箕鄭父

左傳

三月甲戌晉人殺箕鄭父士穀蒯得

梁益耳蒯得不善皆非卿

殺梁傳

稱人以殺誅有罪也鄭父累也

三大夫作亂殺中軍佐固有罪矣曷為不稱國討
時晉侯年幼政在趙盾故稱人以殺見大夫專作
威福而政不自君出也

楚人伐鄭

左傳

范山言于楚子曰

范山楚大夫

晉君少不在諸侯北方

可圖也楚子師于狼淵以伐鄭

狼淵杜注潁川潁陰縣有狼陂在今河南

許州

囚公子堅公子尤及樂耳

三子鄭大夫

鄭及楚平

公子遂會晉人宋人衛人許人救鄭

左傳

公子遂會晉趙盾宋華耦衛孔達許大夫救鄭

華耦

華督曾孫

不及楚師卿不書緩也以懲不恪

獨書公子遂者春秋于魯

事自非特為褒貶則皆從國史不同之于他國也

楚自城濮以來不敢窺諸國以文襄之烈存也今

狼淵之師正其嘗試之時而趙盾不能折衝弭患

乃視為常役緩不及事致楚得志而晉遂不競矣

夏狄侵齊

楚得志而狄交侵矣故書以病晉也

附錄
左傳

夏楚侵陳克壺丘

壺丘杜注陳邑在
今河南陳州南境

以其服于

晉也

秋楚公子朱自東夷伐陳

子朱息
公也

陳人敗之

獲公子筏陳懼乃及楚平

以小勝大故懼而請平也
傳言晉君少楚陵中國明

年所以有
殷貉之會

秋八月曹伯襄卒

九月癸酉地震

公羊傳

地震者何動地也何以書記異也

天動地靜者常也地動者

象陰為陽行故曰異

穀梁傳

震動也地不震者也震故謹而日之也

地道以靜為體以順為正安以承天者也逆其常理而不得節則震而不安其所承矣

冬楚子使椒來聘

椒穀梁作萩楚君臣始並見經

左傳

冬楚子越椒來聘

子越椒令尹子文從子

執幣傲叔仲惠伯

曰是必滅若教氏之宗傲其先君神弗福也

十二年傳曰先

君之敝器使下臣致諸執事明奉使皆告廟故言傲其先君也為宣四年楚滅若教氏張本

公羊傳

椒者何楚大夫也楚無大夫此何以書始有大

夫也始有大夫則何以不氏

據屈完氏

許夷狄者不一而

足也

許與也言進之當以漸

穀梁傳

楚無大夫其曰秋何也以其來我褒之也

先儒皆謂春秋與楚慕義能以禮交諸侯故褒進

之乃樂與人為善之義此大非也商臣負覆載不

容之罪乘晉霸之衰圍江圍巢滅江滅六滅蓼伐
鄭侵陳侵宋其聘魯乃遠交近攻之術亦所以窺
伺東夏耳春秋乃用此褒之而赦其大惡逆天理
悖人情矣而謂孔子有是乎蓋中國無霸楚勢日
張魯人畏其憑陵喜於來聘而以待齊晉之禮待
之故舊史備其辭孔子仍而不革以著諸侯畏楚
之情實耳觀十年冬楚次厥貉亦書爵則以書爵
為褒其不可通也審矣

秦人來歸僖公成風之祔

左傳 秦人來歸僖公成風之祔禮也

秦本非魯方嶽同盟無相赴弔之制

故不譏其緩而以接好為禮

諸侯相弔賀也雖不當事

送死不及尸故曰不

當 苟有禮焉書也以無忘舊好

公羊傳

其言僖公成風何兼之兼之非禮也

禮主于敬當各使一

使所以別尊卑

曷為不言及成風成風尊也

不可使卑及尊也

穀梁傳

秦人弗夫人也

言秦人弗以成風為夫人故不言夫人

即外之弗

夫人而見正焉

見不以妾為妻之正

秦晉方不睦而魯善於晉故秦人歸祔以結魯猶
楚欲圖北方而來聘也過時始至不以緩為譏以
其始通錄之也僖公成風雖母子先君後夫人體
當然也不言及卑不及尊也不稱夫人以義不得
言及尚稱夫人則辭不別白嫌於僖公之夫人耳
葬曹共公

日講春秋解義卷二十四